

大方廣佛花嚴經．淨行品

實叉難陀譯

妙
諦
法
音

南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

大方廣佛花嚴經淨行品

爾時，智首菩薩問文殊師利菩薩言：佛子！菩薩

云何得無過失身語意業？

云何得不害身語意業？

云何得不可毀身語意業？

云何得不可壞身語意業？

云何得不退轉身語意業？

云何得不可動身語意業？

云何得殊勝身語意業？

云何得清淨身語意業？

云何得無染身語意業？

云何得智為先導身語意業？

云何得生處具足、種族具足、家具足、色具足、相具足、念具足、慧具足、行具足、無畏具足、覺悟具足？

云何得勝慧、第一慧、最上慧、最勝慧、無量慧、無數慧、不思議慧、無與等慧、不可量慧、不可說慧？

云何得因力、欲力、方便力、緣力、所緣力、根力、觀察力、奢摩他力、毘鉢舍那力、思惟力？

云何得蘊善巧、界善巧、處善巧、緣起善巧、欲界善巧、色界善巧、無色界善巧、過去善巧、未來善巧、現在善巧？

云何善修習念覺分、擇法覺分、精進覺分、喜覺分、猗覺分、定覺分、捨覺分、空、無相、無願？

云何得圓滿檀波羅蜜、尸波羅蜜、羼提波羅蜜、毘梨耶波羅蜜、禪那波羅蜜、般若波羅蜜，及以圓滿慈、悲、喜、捨？

云何得處非處智力、過未現在業報智力、根勝劣智力、種種界智力、種種解智力、一切至處道智力、禪解脫三昧染淨智力、宿住念智力、無障礙天眼智力、斷諸習智力？

云何常得天王、龍王、夜叉王、乾闥婆王、阿修羅王、迦樓羅王、緊那羅王、摩睺羅伽王、人王、梵王，之所守護、恭敬、供養？

云何得與一切眾生為依、為救、為歸、為趣、為炬、為明、為照、為導、為勝導、為普導？

云何於一切眾生中，為第一、為大、為勝、為最勝、為妙、為極妙、為上、為無上、為無等、為無等等？

爾時，文殊師利菩薩告智首菩薩言：善哉！佛子！汝今為欲多所饒益、多所安隱，哀愍世間，利樂天人，問如是義。

佛子！若諸菩薩，善用其心，則獲一切勝妙功德；

於諸佛法，心無所礙，住去來今諸佛之道；

隨眾生住，恒不捨離；如諸法相，悉能通達；斷一切惡，具足眾善；

當如普賢，色像第一，一切行願皆得具足；

於一切法，無不自在，而為眾生第二導師。

佛子！云何用心能獲一切勝妙功德？佛子！

- | | | | | |
|---|------|------|------|------|
| ① | 菩薩在家 | 當願眾生 | 知家性空 | 免其逼迫 |
| ② | 孝事父母 | 當願眾生 | 善事於佛 | 護養一切 |
| ③ | 妻子集會 | 當願眾生 | 怨親平等 | 永離貪著 |
| ④ | 若得五欲 | 當願眾生 | 拔除欲箭 | 究竟安隱 |
| ⑤ | 妓樂聚會 | 當願眾生 | 以法自娛 | 了妓非實 |
| ⑥ | 若在宮室 | 當願眾生 | 入於聖地 | 永除穢欲 |
| ⑦ | 著瓔珞時 | 當願眾生 | 捨諸偽飾 | 到真實處 |
| ⑧ | 上昇樓閣 | 當願眾生 | 昇正法樓 | 徹見一切 |
| ⑨ | 若有所施 | 當願眾生 | 一切能捨 | 心無愛著 |
| ⑩ | 眾會聚集 | 當願眾生 | 捨眾聚法 | 成一切智 |
| ⑪ | 若在厄難 | 當願眾生 | 隨意自在 | 所行無礙 |

⑫	捨居家時	當願眾生	出家無礙	心得解脫
⑬	入僧伽藍	當願眾生	演說種種	無乖諍法
⑭	詣大小師	當願眾生	巧事師長	習行善法
⑮	求請出家	當願眾生	得不退法	心無障礙
⑯	脫去俗服	當願眾生	勤修善根	捨諸罪軛
⑰	剃除鬚髮	當願眾生	永離煩惱	究竟寂滅
⑱	著袈裟衣	當願眾生	心無所染	具大仙道
⑲	正出家時	當願眾生	同佛出家	救護一切
⑳	自歸於佛	當願眾生	紹隆佛種	發無上意
㉑	自歸於法	當願眾生	深入經藏	智慧如海
㉒	自歸於僧	當願眾生	統理大眾	一切無礙
㉓	受學戒時	當願眾生	善學於戒	不作眾惡
㉔	受闍梨教	當願眾生	具足威儀	所行真實
㉕	受和尚教	當願眾生	入無生智	到無依處

②6	受具足戒	當願眾生	具諸方便	得最勝法
②7	若入堂宇	當願眾生	昇無上堂	安住不動
②8	若敷床座	當願眾生	開敷善法	見真實相
②9	正身端坐	當願眾生	坐菩提座	心無所著
③0	結跏趺坐	當願眾生	善根堅固	得不動地
③1	修行於定	當願眾生	以定伏心	究竟無餘
③2	若修於觀	當願眾生	見如實理	永無乖諍
③3	捨跏趺坐	當願眾生	觀諸行法	悉歸散滅
③4	下足住時	當願眾生	心得解脫	安住不動
③5	若舉於足	當願眾生	出生死海	具眾善法
③6	著下裙時	當願眾生	服諸善根	具足慚愧
③7	整衣束帶	當願眾生	檢束善根	不令散失
③8	若著上衣	當願眾生	獲勝善根	至法彼岸
③9	著僧伽梨	當願眾生	入第一位	得不動法

④⑩	手執楊枝	當願眾生	皆得妙法	究竟清淨
④⑪	嚼楊枝時	當願眾生	其心調淨	噬諸煩惱
④⑫	大小便時	當願眾生	棄貪瞋癡	蠲除罪法
④⑬	事訖就水	當願眾生	出世法中	速疾而往
④⑭	洗滌形穢	當願眾生	清淨調柔	畢竟無垢
④⑮	以水盥掌	當願眾生	得清淨手	受持佛法
④⑯	以水洗面	當願眾生	得淨法門	永無垢染
④⑰	手執錫杖	當願眾生	設大施會	示如實道
④⑱	執持應器	當願眾生	成就法器	受天人供
④⑲	發趾向道	當願眾生	趣佛所行	入無依處
⑤①	若在於道	當願眾生	能行佛道	向無餘法
⑤②	涉路而去	當願眾生	履淨法界	心無障礙
⑤③	見昇高路	當願眾生	永出三界	心無怯弱
⑤④	見趣下路	當願眾生	其心謙下	長佛善根

⑤4	見斜曲路	當願眾生	捨不正道	永除惡見
⑤5	若見直路	當願眾生	其心正直	無諂無誑
⑤6	見路多塵	當願眾生	遠離塵坌	獲清淨法
⑤7	見路無塵	當願眾生	常行大悲	其心潤澤
⑤8	若見險道	當願眾生	住正法界	離諸罪難
⑤9	若見眾會	當願眾生	說甚深法	一切和合
⑥0	若見大柱	當願眾生	離我諍心	無有忿恨
⑥1	若見叢林	當願眾生	諸天及人	所應敬禮
⑥2	若見高山	當願眾生	善根超出	無能至頂
⑥3	見棘刺樹	當願眾生	疾得翦除	三毒之刺
⑥4	見樹葉茂	當願眾生	以定解脫	而為蔭映
⑥5	若見花開	當願眾生	神通等法	如花開敷
⑥6	若見樹花	當願眾生	眾相如花	具三十二
⑥7	若見果實	當願眾生	獲最勝法	證菩提道

⑥8	若見大河	當願眾生	得預法流	入佛智海
⑥9	若見陂澤	當願眾生	疾悟諸佛	一味之法
⑦0	若見池沼	當願眾生	語業滿足	巧能演說
⑦1	若見汲井	當願眾生	具足辯才	演一切法
⑦2	若見涌泉	當願眾生	方便增長	善根無盡
⑦3	若見橋道	當願眾生	廣度一切	猶如橋梁
⑦4	若見流水	當願眾生	得善意欲	洗除惑垢
⑦5	見修園圃	當願眾生	五欲圃中	耘除愛草
⑦6	見無憂林	當願眾生	永離貪愛	不生憂怖
⑦7	若見園苑	當願眾生	勤修諸行	趣佛菩提
⑦8	見嚴飾人	當願眾生	三十二相	以為嚴好
⑦9	見無嚴飾	當願眾生	捨諸飾好	具頭陀行
⑧0	見樂著人	當願眾生	以法自娛	歡愛不捨
⑧1	見無樂著	當願眾生	有為事中	心無所樂

⑧2	見歡樂人	當願眾生	常得安樂	樂供養佛
⑧3	見苦惱人	當願眾生	獲根本智	滅除眾苦
⑧4	見無病人	當願眾生	入真實慧	永無病惱
⑧5	見疾病人	當願眾生	知身空寂	離乖諍法
⑧6	見端正人	當願眾生	於佛菩薩	常生淨信
⑧7	見醜陋人	當願眾生	於不善事	不生樂著
⑧8	見報恩人	當願眾生	於佛菩薩	能知恩德
⑧9	見背恩人	當願眾生	於有惡人	不加其報
⑨0	若見沙門	當願眾生	調柔寂靜	畢竟第一
⑨1	見婆羅門	當願眾生	永持梵行	離一切惡
⑨2	見苦行人	當願眾生	依於苦行	至究竟處
⑨3	見操行人	當願眾生	堅持志行	不捨佛道
⑨4	見著甲冑	當願眾生	常服善鎧	趣無師法
⑨5	見無鎧仗	當願眾生	永離一切	不善之業

⑨⑥	見論議人	當願眾生	於諸異論	悉能摧伏
⑨⑦	見正命人	當願眾生	得清淨命	不矯威儀
⑨⑧	若見於王	當願眾生	得為法王	恒轉正法
⑨⑨	若見王子	當願眾生	從法化生	而為佛子
⑩⑩	若見長者	當願眾生	善能明斷	不行惡法
⑩①	若見大臣	當願眾生	恒守正念	習行眾善
⑩②	若見城廓	當願眾生	得堅固身	心無所屈
⑩③	若見王都	當願眾生	功德共聚	心恒喜樂
⑩④	見處林藪	當願眾生	應為天人	之所歎仰
⑩⑤	入里乞食	當願眾生	入深法界	心無障礙
⑩⑥	到人門戶	當願眾生	入於一切	佛法之門
⑩⑦	入其家已	當願眾生	得入佛乘	三世平等
⑩⑧	見不捨人	當願眾生	常不捨離	勝功德法
⑩⑨	見能捨人	當願眾生	永得捨離	三惡道苦

⑪⑩	若見空鉢	當願眾生	其心清淨	空無煩惱
⑪⑪	若見滿鉢	當願眾生	具足成滿	一切善法
⑪⑫	若得恭敬	當願眾生	恭敬修行	一切佛法
⑪⑬	不得恭敬	當願眾生	不行一切	不善之法
⑪⑭	見慚恥人	當願眾生	具慚恥行	藏護諸根
⑪⑮	見無慚恥	當願眾生	捨離無慚	住大慈道
⑪⑯	若得美食	當願眾生	滿足其願	心無羨欲
⑪⑰	得不美食	當願眾生	莫不獲得	諸三昧味
⑪⑱	得柔軟食	當願眾生	大悲所熏	心意柔軟
⑪⑲	得粗澀食	當願眾生	心無染著	絕世貪愛
⑫①	若飯食時	當願眾生	禪悅為食	法喜充滿
⑫②	若受味時	當願眾生	得佛上味	甘露滿足
⑫③	飯食已訖	當願眾生	所作皆辦	具諸佛法
⑫④	若說法時	當願眾生	得無盡辯	廣宣法要

⑫④	從舍出時	當願眾生	深入佛智	永出三界
⑫⑤	若入水時	當願眾生	入一切智	知三世等
⑫⑥	洗浴身體	當願眾生	身心無垢	內外光潔
⑫⑦	盛暑炎毒	當願眾生	捨離眾惱	一切皆盡
⑫⑧	暑退涼初	當願眾生	證無上法	究竟清涼
⑫⑨	諷誦經時	當願眾生	順佛所說	總持不忘
⑬⑩	若得見佛	當願眾生	得無礙眼	見一切佛
⑬⑪	諦觀佛時	當願眾生	皆如普賢	端正嚴好
⑬⑫	見佛塔時	當願眾生	尊重如塔	受天人供
⑬⑬	敬心觀塔	當願眾生	諸天及人	所共瞻仰
⑬⑭	頂禮於塔	當願眾生	一切天人	無能見頂
⑬⑮	右遶於塔	當願眾生	所行無逆	成一切智
⑬⑯	遶塔三匝	當願眾生	勤求佛道	心無懈怠
⑬⑰	讚佛功德	當願眾生	眾德悉具	稱歎無盡

⑬⑧ 讚佛相好 當願眾生 成就佛身 證無相法

⑬⑨ 若洗足時 當願眾生 具神足力 所行無礙

⑬⑩ 以時寢息 當願眾生 身得安隱 心無動亂

⑬⑪ 睡眠始寤 當願眾生 一切智覺 周顧十方

佛子！若諸菩薩，如是用心，則獲一切勝妙功德。一切世間諸天、魔、梵、沙門、婆羅門、乾闥婆、阿修羅等，及以一切聲聞、緣覺，所不能動。

大方廣佛花嚴經淨行品

無上妙法喜見聞 讀誦修持為他說 福慧二嚴三障除 捨離眾惱出塵刹

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



妙法寺 香港新界屯門藍地青山公路18號 mfbm.hk